

PARADA DI MUCHA NA SAN NICOLAS

MENOS LUHOSO CU AÑA PASA

PERO IGUAL NA LARGURA Y DURACION

ORANJESTAD(AAN)—

E aña aki e grupo di Esso a keda afo di parada di San Nicolas, sinembargo a logra toch di haya 11 grupo den e parada di mucha, lo cual ta un menos cu aña pasa, y den musica tabata tin e aña aki 8 agrupacion di cual 2 tabata steelband, un conhunto y 5 brassband.

E parada no tabata tin e luho di esun di aña pasa, sinembargo Pieterboer School, Te Aworo, Rayo di Solo y Tarciciusschool di Savaneta atrobe a scapa cara di San Nicolas cu nan participacion en grande anualmente.

Largura di e parada, pa duna un ehemplo facil, tabata di un punto di B.v.d. Veenzeppenfeldstraat pa e otro.

Ora cu cabez di e parada a yega na Ramiro's cla pa bira den Lagoweg, e rabo, tabata dilanti di Central Madereinse.

Na un sitio para, e duracion di e parada tabata mescos cu aña pasa, esta 35 minuut.

E ambiente carnavalesco di aña pasa tambe tabata falta den e parada di ayera na San Nicolas.

Si aña pasa tur caminda tabata tin bulamento y bailamente, e aña aki e publico a para keto mira e parada.

Dos or exacto e parada a sali for di Theresiaplein, cu Royal Star Brassband dilanti como prome agrupacion musical.

Hunto cu e brassband a sali na cabez e mas o menos 40 reinanan di distrito y di organizacionnan hunto cu e prins y panchonan.

Despues a sigi e prome grupo cu tabata Commanduer Pieter Boer School cu su "Highlights of Aruba, consistiendo di 100 mucha bisti den nan traha simbolizando bandera di Aruba, Escudo di Aruba, Lago, Cunuqueronan, Indiannan, Aloe, varios sorto di bestia matanan y floran.

E grupo aki tabata tin su dilanti e carosa di Reina Infantil di Carnaval di Aruba Tricia Werleman, cual carosa a ser patrosina pa Americana Casino y tabata consisti di algun montaña di Aruba, cu un juana tambe ariba dje.

Hell Angels Brassband a sigui tras di e grupo aki y mes ora su tras e grupo di Bunnies di Rayo di Solo, mas o menos 150 mucha cu nan reina Julaika Maduro ariba su carosa.

E tercer grupo tabata Jungle Fever, sigui pa e reina individual Lisette Schotborg kende tabata Sjaolin Prinscess y tur na blauw.

Grupo 4 di e parada tambe tabata bunita y esaki tabata Santa Claus den Carnaval di Savaneta Aden, cu 80 mucha disfrazo como Santa Claus y cu nan carosa cu dos bina dilanti di un slee ariba cual tabata tin reina Jennifer Bislick di Savaneta.

E grupo aki tabata tin musica di Blues Brassband Bunita tambe tabata e carosa di Sapato di San Nicolaas cu Carlos Odor den dje.

Otro grupo basta grandi tabata Roodkapje di Te Aworo cu su 80 participantenan roodkapje y ca-

zadornan.

Despues di e grupo aki a sigui Shiribana Brassband y un buggy cu Runnerup Marie Brokke den dje.

Tras di e buggy a sigui un grupo di payaso cual tabata un grupo chiquito, y mes ora a continua e grupo di Jammin Brass, mas o menos 100 mucha cu flanelnan di e brassband, carson blanco y mea blanco.

Mas patras den e parada tabata tin e grupo musical Buck Explosion cu su tras Indian Fantasy cu 20 participante, Steelband

Young Ones, y e grupo di Space Mission cual grupo tambe tabata tin mas o menos 20 participante cu nan robot Made In Aruba.

E ultimo Grupo tabata e grupo di payasonan di Silvia Lourens cu a sera e

parada, prome cu e grupo aki a pasa e steelband di Tanki Leendert y despues Van di Polisa bini tur patras.

Aña pasa Aruba a mira un di su carnavalnan di mas bunita di ultimo añanan na San Nicolas, y e aña aki, e grandura a keda casi mescos, pero den luho si por a nota un caida y tambe den musica.

